

# Poljoprivrednici doveli krave pred sud

Policija zabranila poljoprivrednicima okupljanje pred zgradom Ustavnog suda BiH • Traže vraćenje na snagu suspendovanog Zakona o zaštiti domaće proizvodnje

Članovi Udruženja poljoprivrednika BiH protestirali su jučer ispred zgrade Ustavnog suda BiH u Sarajevu. Poljoprivrednici su, kako je ranije bilo najavljeno, dovezli kamion krava koje su trebali pustiti na ulicu ispred Ustavnog suda, međutim, policija im nije dozvolila obrazlažući da bi to bilo nepoštivanje digniteta Suda. Također, policija je poljoprivrednicima zabranila okupljanje pred ovom zgradom, nakon čega su se poljoprivrednici razišli.

Oni su na ovaj način pokušali izvršiti pritisak na Ustavni sud da što prije donese odluku o suspendovanom Zakonu o zaštiti domaće proizvodnje. Njihov stav je da odluka o suspenziji ovoga zakona pogoduje uvoznim lobijima zbog čega domaća poljoprivreda trpi ogromne štete.

## Ponovo protesti

Naime, Zakon o zaštiti domaće proizvodnje usvojen je krajem juna ove godine, a početkom jula već je suspendovan i čeka se odluka Ustavnog suda o tome da li je Zakon u suprotnosti sa Ustavom BiH. Ovim zakonom bilo je predviđeno uvođenje punih carina na uvoz određenih poljoprivrednih proizvoda iz Srbije i Hrvatske. Zagovornici Zakona smatraju da će na ovaj način doći



Najavili novo okupljanje za petak

Foto: A. KAUMOVIC

do jačanja domaće poljoprivrede koju trenutno guši nekontrolisan i ogroman uvoz prehrambenih proizvoda. S druge strane, protivnici Zakona kažu da je on u suprotnosti sa odredbama Sporazuma CEFTA, te da se domaća proizvodnja može zaštititi u okviru CEFTA ukoliko se dokaže da uvoz onemogućava razvoj domaće privrede. Još dodaju kako bi kontramjere susjednih država

izazvale više štete nego koristi našoj privredi.

Udruženje poljoprivrednika, kao glavni zagovornik ovoga zakona uz predlagača, zastupnika u Parlamentu BiH Jerka Ivankovića-Lijanovića, ne odustaje od prvobitne namjere, te su za 25. septembar najavili novo okupljanje pred zgradom Ustavnog suda.

Udruženje Kupujmo i koristimo domaće-kvalitetno proizvedeno u

BiH iskazalo je punu podršku poljoprivrednicima BiH.

Zakon prema saznanjima ovoga udruženja ne krši odredbe Sporazuma CEFTA i ima za cilj da izjednači uvjete za poslovanje domaćih i stranih firmi koje posluju na teritoriji BiH, te da stvori zdravo poslovno okruženje.

Projekt-menadžer za makroekonomski sistem Vanjskotrgovinske komore BiH Igor Gavran je

mišljenja da insistiranje na ovome zakonu i vršenje pritiska putem protesta nije najbolje rješenje za zaštitu domaće proizvodnje. On kaže da kršenje CEFTA neće donijeti ništa dobro našoj privredi, i ono malo koristi što se ostvari uvođenjem carina na određene proizvode, što je predviđeno Zakonom, biće u sjeni mnogo veće štete koja će nastati jer će susjedne zemlje uvesti recipročne mjere.

## Završiti priču

"Nije ovaj zakon pitanje života i smrti za našu poljoprivredu, ona će preživjeti i ako Ustavni sud donese pozitivnu odluku, ali i ako odluka bude negativna. Jedino u čemu se slažem sa poljoprivrednicima, kada je riječ o ovim protestima, jeste da Sud treba što prije donijeti odluku, da se konačno završi priča oko tog zakona", kazao je Gavran.

Ipak, stanje u bh. poljoprivredi i nije tako loše kako se predstavlja u javnosti, a to najbolje ilustruje podatak da agroindustrijski sektor BiH u okviru CEFTA bilježi rast izvoza i smanjenje uvoza, dok se u ostalim zemljama CEFTA uvoz u ovome sektoru povećava.

"Kada se stvari tako pogledaju, situacija nije tako loša, u svakom slučaju, bolja je nego prije par godina", kazao je Gavran.

J. SALKIĆ